



屠漸山蘭暉堂集卷之十一目錄

墓誌銘

勅封承德郎南京刑部主事坦菴張公墓誌銘

故宣義郎簡菴陸公墓誌銘

亡兄文濬墓誌銘

封刑部主事劉君墓誌銘

明故成國公贈太保謚榮康朱公墓誌銘



南州書樓藏書		
徐	湯	殷
編	字	號
年	月	日

明故賈母安人姚氏墓誌銘

明資政大夫四川布政司左布政使一

菴陶公墓誌銘

長醉翁卜君墓誌銘

樂善沈翁合葬墓誌銘

故春湖俞先生合葬墓誌銘

包隱君墓誌銘

姪鏞壙誌銘

屠漸山蘭暉堂集卷之十一

勅封承德郎南京刑部主事坦菴張公

墓誌銘

屠應垓曰予嘗再謁張封君矣踈髯而廣頰

愉愉可親也殊不好論議至其論議則剴切

無隱中時肯好問名山水比觀李子邦良所

為狀不誣哉封君諱記字巨博其先臨川人

六世祖志順避元亂徙南昌為南昌人志順

生伯安伯安贅居木山生希孟希孟生簡明

簡明生穎是生封君封君少業舉子通諸經
矣則嘆曰嗟乎夫業規規困人志奚足爲也
遂棄去旣應辟爲藩司椽藩司官長重器之
數舉以就第卒不就又嘆曰嗟乎是奚浼我
夫烏鳶逐腐鼠而自飮也鴻鵠翛然奮飛而
不息夫物固各有志耳又棄去歸卧林壑間
治畦圃手植諸花木時命酒欣然坐其下終
日蓋人莫窺也家無多貲顧好施與人人以
困告卽不問家有無無卽推己衣食與之矣

吊死問疾必先往後罷又鳩里中子弟延塾
師訓教之不受費里中多德封君封君性坦
夷甚率不記嘗所德者尤惡機事凡局圖技
藝巧而爭者不習也與人居黠黠似愚不嬰
情去留每自稱坦菴子然其處家庭恪慎無
過母早喪終慕不倦日事父側凡應對言不
聞垣一方以身率子弟多可法生平好遊覽
長子欽官南京卽之南京其季鏊官京師卽
又之京師廼竟卒于京師封君生正統癸酉

卒于嘉靖辛卯享年七十有九素饗饜無疾
一疾遂不起配熊氏廣西僉事熊公景次子
也子男四長欽南京刑部郎中次錢驛丞次
鑑方待選次鏊翰林庶吉士歷禮兵二部主
事女一適鄔湍孫男五統綬緯緒纓綬緯俱
補郡弟子員孫女五曾孫男一昆瑞初欽官
主事時秩滿三載 詔封公如其官故人稱
張封君熊氏封安人先三年卒封君畜德弗
耀逮其諸子行饗之矣且子孫成立者已親

觀三世而封君卒時仲子錢適來及諸孫曾
俱侍屬續無遺憾天之報善人有徵也哉錢
等扶柩歸南昌木山與熊安人合葬于灞西
溪湖山牛皮岡之陽而徵鏊之同年友屠應
竣爲之銘銘曰嗚呼封君取嗇而博予坦坦
率履其社纚纚既食于子亦未綏是

故宣義郎簡菴陸公墓誌銘

屠應竣曰盛哉鄞有陸氏云非直其仕者皆
良大夫也顧其家有隱君子焉往予官刑曹

咨故實覽觀尚書瑜所讞獄狀卓然一時名臣也間從其從孫銓游爲予誦說宣義公隱行則嘆曰嗟乎有本哉有本哉公諱儵字文亨別號簡菴子弘治間入粟實邊賜秩宣義郎乃人又稱宣義公云宣義公自上世居鄞高祖睿贈尚書曾祖應祥祖琦父垸贈御史母錢氏孺人御史蓋生五子焉長偕次儀次公次份次偁副使副使最少爲儒生失父母早諸兄弟皆異產居殖貨儒生躬治家其欲

以家食病志者數矣宣義公慨焉憐之獨不異產居乃并縮家政以故偁得卒業舉進士爲御史歷副使副使遂終宦不問產惟日敬事宣義公產亦裕宣義公又誨諸從子咸有立也家嘗畜二貓貓乳子啣置堂而偕棲而遍乳之伊伊不擇子子亦不獨有其母也于是鄞之人謹曰咄斑斑尾毳毳羣兒連卷腹兩母貓母緩緩入則顧謹聞于朝大學士長沙公爲之歌入載秘史于是宣義公之名殷

殷動天下矣宣義公又性好施里中貧人謁
所欲輒貸所欲與券不却然時時亡之里中
豪滑兒卽謂宣義公善亡券卽詐爲貧人持
空券來請貸公亦竟貸不記券其償者十才
二三耳正德己卯逆藩亂江右都御史孫公
燧死之其子輿喪歸將葬邑人訟其墓購重
值急甚其子貸弗得謁宣義公公嘆曰嗟乎
孫大夫捐不貲之軀爲國殉難苟其母死予
百口之弗恤矧茲金乎乃立出數百金與之

邑之人又無弗頌宣義公矣宣義公言曰夫
兄弟與身子之與兄弟子一也愛兄弟不若
身忘其父母也愛兄弟之子不若子忘其兄
弟也故其愛兄弟若子無弗若其身與子矣
其弟若弟之子愛敬之亦無弗若其愛身與
其父母矣故鄞之人有弗孝且愛者則衆且
戲曰是胡弗若陸宣義已也嗚呼是可謂篤
行君子也已矣公生于正統癸亥二月十一
日卒于嘉靖己丑十月二十九日享年八十

有七娶徐氏范氏子男一鉉女二孫男三淳滂沛孫女二以庚寅正月十二日葬于西山之陽越明年其從子叅政鉅令其弟郎中銓撰次其行徵予銘而太史鈇爲之表三君皆副使公子予所謂良大夫也嗚呼是可以觀宣義公矣銘曰棟隆遽遽興于崇基豐如憑如賴彼峽岬翼翼宣義陸氏以光矢其德順俛天而昌民斯謚斯孰僞而格物協厥靈神載之德肅肅丘中樹梓與桐言庇其宗奕世

有融

亡兄文濬墓誌

兄名聖字文濬弱冠補博士弟子制凡博士弟子稱者月予廩石歲逋貢而兄食廩幾三十年遂以老近令不得以弟子老者貢以故兄不獲貢死家貧甘勤苦一晝日能書字至二萬餘性介僻絕俗雖諸父長者非歲時若有召不至至亦無他言徒就席起居輒罷去又善面斥人踽踽行一意而已頗嗜酒月得

廩輒償酒負僦居城南或竟日突無煙惟桴
然卧也諸衆人有問遺率卻不受或雅所敬
重受之乃曰使屠君受若遺若顧不重耶以
故人憚之不敢數有遺也時博士弟子多就
官長往來或代去不問賢不肖率徵文立石
頌德政諸官長亦數數與延譽兄見之面盡
赭目注視久之曰嗟乎此與丐人諛盜得食
何異死不爲也至公事宜廷謁或就博士授
經諸弟子謂無所於稽也多不往兄獨如期

往冬月寒甚衣布單衣被鵠袍曳垢帶踉蹌
行風雪中頭種種也娶倪氏年五十無子或
勸買婢兄笑曰若見富貴人多姬妾顧皆有
子耶天欲使我有子則我壯時子生不死矣
今故使我貧且孤也卽有婢又安所得食乎
乃竟已以嘉靖甲午四月望卒壽才六十有
七年也諸族姓爲之具棺槨塋于城東白苧
原

封刑部主事劉君墓誌銘

始余校試豫章得肄四詩者讀其文繹辭沛
思至終篇猶若不竟其意焉曰士有文若此
乎其源注深長矣遂列冠諸詩士先比揭氏
名則劉子起之也明年起之連舉進士仕爲
刑曹郎雅覲余于邸則數道其世行乃知有
今封君蓋翩翩遺世隱君子也則歎曰語有
之蠲飛蛸蛸育子爲蠶夫起之誠賢不猶出
其父之型埴乎自是余雖未識面儀然心嚮
企之乙未夏五月起之忽以艱訃告越旣旬

乃持同官張子濟甫狀踵麻經案案映旁若
涕長潛橫下泣進曰伯躍幸以先君子之德
獲茂奉先生訓從搢紳之列且數年日夜殫
心志期不墜遺體茲天降割于先君子伯躍
不忍勦絕圖不朽翼永世惟先生寔惠知死
者願貺賁一二言留紀著玄石屠子曰悲乎
士策名爲臣苟有不替顯親之志卽忘所樹
立鮮矣孰令起之不懈若是乃速奪其親之
年邪從其請志焉曰封刑部主事劉君者南

昌羅池里人也名傑字某其先出丹陽郡唐末避黃巢亂徙信州玉山日歸之者宋寧宗時仕南昌因以官留家傳三世爲孔文孔文生孟孟生仲仲生叔叔生季季生子明娶余氏生君君爲童慧發長慕學受詩業應舉家世貧兩兄復早世懼弗克力養或曰夫儒難必成耳顧又患弗專卽爲椽史易致身又不廢生業也君信之入謁郡守郡守見訝異之曰若不爲儒生邪曷驚志易素營哉夫屑小

者大遺計速者忘遠若勉哉卒乃業也君繇是奮思強學駸駸乎閎肆于前矣然每試有司輒弗薦君歎曰良田刈罽無失勤而不遇豐年則非命也與遂捐去授諸子弟業後起之聲實日後蔚君復喜曰吾不能自見于身卽子儻有立吾蓬戶褐衣訖吾身忘恨矣洎起之旣通顯則又數詒書詔誨曰士貴自振立吾身隱而志欲章斬汝能不緇鱗也若俛仰僥時苟趨利祿則吾曷賴矣夫其善迪蓋

亶亶焉於乎迹其志豈非魁梧長者之遺乎
君爲人尤樂崇義行劉氏世澶衍蕃衆宗法
舊立而宗子隳替君率族衆修譜明系擇長
賢一人爲宗子俾世統勿壞劉氏用翁翁焉
先世逸塚有侵於他族者君按譜理論宣以
至誠侵者竟還之諸凡所著賢者類不可殫
序要之力學不謀其身直行不詭其志可謂
易諒砥行異於矯世稱奇者矣抑前伸後闡
無不彰天之理儻可信乎君配熊贈安人先

卒繼孫子男三長伯躍卽起之今爲儀制員
外郎次伯翔補校官弟子次某孫男子四君
生成化丁酉八月六日歿今乙未四月二日
年五十有九起之歸將卜塋于某地塋以某
月日銘曰騏驎服韉不可使駕鼓車松栢旅
閑不可使柱官閭遺秉失帶溢其後儲若丘
旣委積世豐敷窶厥玄窳有封翼如於千斯
祀尙永安究乎若區

明故成國公贈太保謚榮康朱公墓誌

銘

成國公姓朱氏諱鳳字鳴周其先鳳陽懷遠人也六世祖亮從高皇帝起兵授燕山護衛副千戶卒子能嗣事文皇帝于燕邸革除間朝廷數言燕事文皇帝居悒悒深念能奮曰嗟乎明主能先敵以拓基壯夫不習危而執諒顧能無徒死耳事急矣大王豈無意乎于是文皇帝然之決策內靖及與諸軍戰能甚力陷堅摧鋒功最天下既定封成

國公子孫世世弗絕征安南歿于軍追封東平王暨其三代謚武烈子勇嗣侍睿皇帝北狩死于兵追封平陰王謚武愍子儀嗣留守南京卒謚莊簡子輔嗣繼守南京加太子太傅拜平胡將軍卒贈太傅謚恭僖子麟嗣奉命謁祀顯陵道卒無子公以恭僖次子嗣八年肇立皇后親蠶儀迨建四郊俱與參謀議授五千營坐營十一年命代祀大社稷十三年四月有事于太廟命

捧 文皇帝壬五月命掌中軍都督府事十
四年冊立 端妃命充正使持節展禮五月
䟽乞罷政 上允之十二月復命充正使持
節往冊封 荆王明年三月 上肇謁 七
陵命禮部䟽勲舊臣詣 孝陵告祀因 諭
兵部馳召公還公兼程赴命中道疾作䟽聞
七月六日卒于家 上命有司議卹典贈太
保謚榮康娶白氏繼徐氏俱封成國公夫人
子男三希忠希孝希祖公生而穎秀少習尚

書春秋武經俱務通大意事父母孝處友信
教子嚴而有方御衆恩而不狎性喜飲酒飲
輒醉煦煦笑言與物無忤善交懼士大夫賓
客自四方至者雖貧賤必與均禮幼頗豪宕
及嗣大命在 朝廷斤斤簡質見于體貌
上以故親信之諸凡大典禮多翊贊其間輒
被 恩賚歲時朝會 上以公宗臣班特進
中陛率羣臣贊拜稱 壽 制命宣答臚句
傳寵光赫燁禮與羣僚絕云國家受 命創

圖經綸天造 高祖攘馭裔胡 文皇緝寧
內難豪傑嚮動武人屈起俱能翊扶王運啓
集大勲依日月之休光憑雲雷之渥澤丹書
信誓封爵三等慶流子孫與明無極也承平
既久兵革罕試聯蟬鳴玉接踵于 清朝建
節啓疆鮮功于制閭要以酬獎世臣斯亦畜
銳養威之策也往予與成國公論事實持重
無他華然亦諤諤有以自奮間嘗語人曰鳳
也位上公蒙重祿于國家未有尺寸譬之豢

虎上林飽駟天厩徒有其名耳然敢忘爪牙
之利馳驅之節哉兄麟居疾荆湖公聞之卽
沂江往日夜不少憇時春水盛人或諫之公
佛然曰夫君臣父子兄弟人之紀也兄疾困
死生且不保而吾方于徐自便卽國家有急
豈能賴旦夕之用哉由是言之較之紈綺之
子世祿尸素者異矣使其遭時有以自見豈
遠忝于其祖哉銘曰朱氏煌煌翊我 二皇
亮始雲憑能實龍驤宗工元命再世五王烈

烈平陰狗忠允臧迨孫不祿弟熾而昌耆武
雖緝揆文克襄嗣彼先哲休有懿光

明故賈母安人姚氏墓誌銘

按狀安人姓姚氏其先姚江人也避元亂走
嘉興因家焉曾祖伏祖驄父禎俱有隱德成
化間有御史綬者工詞翰爲郡名家寔安人
從叔祖也以故安人生而聰敏知書大義賈
氏西溪君者封君素菴父也西溪於姚氏以
家聲相葺又稔知安人賢遂令封君委禽焉

既歸賈氏則封君兄亡矣於是安人以長任
事能善事封君父母又善工蠶繰每歲必率
協共事獻成于姑惟所命未嘗以私勞望也
西溪君先卒時封君爲學官子弟藉藉有聲
矣竟以養母奪志無意進取督學者嘉之亦
竟遂其志優以衣冠焉安人曰汝以孝聞姑
爲賢母盖過祿養矣他何望哉姑性峻急卽
諸婦無能當意者顧獨宜安人輒稱曰孝婦
孝婦安人性仁恕不妄言笑御下人益恭肅

見貧乏者惕然思成之與諸叔居終身無迂
言有已嫁姑者家貧無以自業安人爲迎養
且爲嫁其女云性儉素至老猶紡紉不輟不
理于綺華惟歲時一飾冠帔而已顧於教子
迺獨不計費至脫珥簪具爲延師友以故其
子名儒學有成立舉甲科嘉靖辛卯任刑部
主事會有 恩詔得封母爲安人名儒任刑
部時則嘗謂予曰不肖適奉母氏書曰式敬
爾獄明清爾心顧愚不肖弗克祇若焉及掌

司奏牘則又嘗謂予曰不肖適又奉母氏書
曰勿以責重而矜勿以獄孚而喜顧愚不肖
弗克祇若焉余時心竊嘆之而賈君亦敬奉
母訓典職數年無惰事於戲安人於賈氏可
謂大賢婦母矣子男二長名何次卽名儒女
一孫男女四抑予于安人之故也則喟然嘆
曰嗟乎禍福之遘豈能豫哉癸巳之歲賈君
爲刑部郎中予親覲見之也時考功吏翫法
受賂事覺衆莫按賈君卽立逮按國制京朝

諸曹官尊等耳然吏部獨得據例黜陟人以
故諸曹官莫敢忤時賈君獨以按吏忤于是
考功大夫則計出賈君知姚安姚安去京師
萬里土多瘴疫善死人而賈君之姚安則道
出嘉興適太安人病篤乃留獲晝夜侍比卒
又獲襄事無他憾而直聲碩益起越六月遂
改知贛州向之以計困者寧豫為幸也豈不
有命哉豈不有命哉是故人有謂計勝命者
愚也予偉君之行誌毋墓而為之銘銘曰淵

有珠流斯炫斯實之纍纍載俎其輝闡有隱
美式穀是誨

明資政大夫四川布政司左布政使一
菴陶公墓誌銘

嗚呼予忍銘陶公墓耶予言陶公事未嘗不
酸鼻撫膺仰天而飲泣也卽予弗忍銘則知
陶公無若予者嗟乎傷哉予從仕數年見今
時士大夫固多循良長者然睢恣暴亢瘠民
以自厚者不鮮也亦多躋歷華要高享其天

年而子孫蒙利數世乃陶公較之有差矣顧其年不甚壽妻子剿絕靡苒苒遺焉天之報善人何徵哉公名照字時明稱一菴子其先宦事宋十六世祖以將仕郎扈蹕南渡九傳至菊隱君始定居秀水之鴈湖人稱鴈湖陶云菊隱君且歿戒子孫弗爲元官於是子孫業農者終元之世曾大父鉦大父濟父松母張氏 敬皇帝時公才年二十餘與兄煦同舉於鄉繼又同舉于春官于是人又稱鴈湖

二俊云公始拜都水主事以母憂起改刑部錄囚蘇淞蘇淞者嘉接壤也親戚賓客交通焉人爲公難之公至通如平生乃有犯悉寘之法曰吾公私弗淆也未幾出爲廣東僉事廣東故多蠻獠豪滑時大盜唐大鬚者起惠潮梁閩琛者起清遠皆號萬人公察土兵陳朝亮者才也乃召朝亮入授以進止累糧逮捕不煩帑藏廣中悉定戊辰以父憂起改湖廣庚午拜四川參議時藍鄙作亂蜀人驚擾

先是公過新都新都者道衡而無城公慮無
守卽日命城之城畢而寇至人賴以安竟以
平鄆功授從三品俸加賜金綺壬申以副使
備兵威茂威茂古羗夷也邊郡瘠耗而守臣
徐叅將者性鷙酷日鞭撻軍吏於是羗夷聚
數萬衆謀奪叅將公單騎出撫諭以威福衆
泣拜解散然猶忿忿于叅將公乃繩其部下
以懾羗夷心而叅將者竟怏怏弗平于公誣
公致變議者莫能明公亦自薄其官遂居疾

鴈湖之上者數年庚辰復官河南時制河南
以憲臣監小灘兌兌常不足往往取足於官
歲不下數萬金又總部京儲者率逾年不完
責償民間幾亦數萬習弊滋甚公所至立規
畫謹簿書抑豪右節浮靡秋毫無犯公私兼
裕焉乙酉陞雲南右布政尋陞四川左布政
先是爲雲南時有盜稱大眼者鳩衆橫行岨
峨間阻險深入歲不能下公至卽平定之于
是詔復賜金綺公性斤斤簡勅言不出口

未嘗面可否人至所歷乃表表以武功見相
士失外寧有旣哉在四川以繼母憂去又二
年遭讒罷官家居幾十年迄無怨語嘗謂人
曰布政縮司錢穀謗翕翕易起人眩庶自飭
而吾于徐弗以外曠當逆瑾時人有官不患
不能顯而吾優游舊僚要之無疚耳與鄉人
處油油煦和無問賢不肖善振施族人賻賻
其死喪人咸德之平生無怒容雖臺輿滅獲
弗嚴斥也配梅氏繼朱氏先公半年卒子

培后二月天死今俱在殯初公以培議姻于
予也朱夫人卒予往吊焉適公病亟予就視
于閨中公視予曰嗟乎天固以予子清先生
也繼又曰予內子死妾劉者和而婉劉保其
內先生禦其外培猶有父若母也予敬諾時
甲午九月十日耳越六日公竟卒年止六十
有七子培夭以病痘嗟乎傷哉天之降禍于
陶寧有紀也欲殲其子先奪之母焉覆其身
斬于其宗焉一歲而三喪會並發俱窆時所

鮮違鬼神者寧有知否也予言之予不知涕
之無從也已公存時以猶子里爲嗣女四長
贅壻舉人吳超治命偕里紹其家次歸常德
守陸邨次指揮項元淳次沈茂元墓在秀水
思賢鄉里若超以丙申歲冬閏十二月二十
二日襄事朱夫人子培會塋銘曰陶氏英英
代有令人在宋允熾于元弗賓公振厥聲載
德懿文弗泐于俗遵彼先民善積罔枯爰遣
者數木披其心樛枝則附奕奕新阡松栢丸

丸有隆雙丘覆彼三棺

長醉翁卜君墓誌銘

長醉翁者名宗洛秀水思賢里人也性喜飲
酒飲輒醉慙慙不辨人人稱曰長醉翁君聞
之喜曰吾長醉足矣亦自稱長醉翁云曾大
父璿璿生顒顒生周周生宗洛世爲里中富
人正德中以訾補太學生制太學生得補卽
官員翁顧謂里人曰人顧能自貴耳卽組緹
奚爲哉往予詣長安觀諸貴人乘朱輪拖龜

奮颺疾雷叱咤當世當世士方蟻附之且旦暮若晞露奄忽死矣况入粟卑資乎吾醉已夫里人再諭之卽詈曰夫貴人能積財不過多置鍾鼓婦女飲醇酒善飯遺矢耳非與吾異也吾奚若慕遂不復詣太學日蹲蹲居忽復偃卧賓客或衣冠具禮謁卽闔戶辭曰吾不能曳袍執經見國祭酒乃令設冠裳見里中兒耶竟不報或袒裼躡革造之卽欣然曰是習知長醉翁者延與飲盡數晝夜乃罷人

輒笑之竟其生不與世忤亦不問家人生產作業起居一室中至苔蘚生几下行遇丘土卽笑指曰此隆隆糟丘吾他日永歸者與父之人亦稱長醉翁曠度有達士風性最孝弟有同母妹者嫁予甥爲婦歲時歸寧問所欲卽挈與往或不言卽笑曰母有一男女耳不足非財也輒自擇所愛推與之人以故又稱長醉翁孝子男四人長大同次大有俱有才畧次大觀大順大同舉嘉靖戊戌進士未拜

官翁遽卒之前可十數日呼大有曰來吾平生無顯善亦無隱惡今死矣而兄幸一第爲時才賢無所恨吾見吾郡邑諸官長卽賢不肖人所指稱上逮父母可不慎哉吾死當以六月三日至日悉召宗族子弟數十輩前沐浴跌坐氣奄奄逝享年五十有四越月訃至大同哭踊隕越幾不生數日乃餒粥杖起崩角纍纍口弗能言也予觀近世經禮崩壞士大夫聞父母喪者方啣恤爲禮容與賓客

周旋繩墨又謁謝諸貴長者而吏制猥縵復令京朝官堂謁面稽其大僚具品服襲錦秉簡陞辭天子乃得去此豈錫類彰教律忠以孝之誼哉予時欲據典奏罷以非職輒止若大同者予所鮮覩長醉翁教子孝蓋足徵也從其請爲之誌若銘銘曰世方囂尗而君若頽彼醒孔棘君衷恢恢萬世一息醴丘永歸異乎予榮生爲妄而更述死悲也

樂善沈翁合塋墓誌銘

秋官大夫沈君翔卿以進士茅順夫次其先
大父樂善翁行實問予誌若銘予雅與大夫
游且習知順夫是其言不誣按狀樂善翁者
姓沈氏名澄其先諱慶吳之安固里人也慶
生子壽壽生文文生榮榮生士明始遷烏戌
曲家焉士明生翁翁性仁孝子諒朴衷無他
腸與人游未嘗忤也晚乃自稱樂善翁人亦
稱之爲樂善翁云翁初長鄉賦有司罪他賦
長翁矍然曰吁賦長均耳乃吾亦可以加此

夫於是拜其先像泣曰死而死耳無使受污
汚衣猶不可澣况先人之遺體乎夫吳之民
所以赭服蒙中僂及其先人者徒以貲厚役
重故也于是遂廢著不問家人產業日與里
中豪士飲酒歌呼放浪山澤間晚歲益貧漠
然弗厭也里中少年嘗有侮翁者翁弗與較
顧善下之少年慚謝去更卑事翁翁卒之日
里中知與不知相率赴其喪無不泫泫泣者
嗟乎予窺觀于世其叢貨厚殖務富以自殃

者不鮮也顧沒身而弗覺苟臨利害如毫毛
卽眦睨擊逐至以生死而翁獨能散貲全身
執柔巽以御暴是故逸于智無勞于利任于
容人無任爲人容若翁者其有君子之度矣
翁娶徐氏生子鑑以正德己卯冬十月十二
日先徐氏卒鑑讀書善屬文爲學官弟子員
舉歲貢遊南太學躬勅行不治家故貧益甚
日飯不再衣敝不更又不樂爲貧嘆曰壯兒
弗克起家已矣顧無以養寡母柰何母笑曰

兒來吾語爾夫南金垂玉一生孰其主哉一人
得之而富衆人失之而窶是各有命也爾以
而志事我顧不美與數年鑑謁選領元氏尹
其子應龍舉進士鄉人口嗜天道不爽也乃
元氏有子樂善翁有孫矣當元氏之居縣也
念母甚曰有子不能事母曾欲子民耶卽解
印綬上御史不可廼使屬其子乞南官便事
太母子遂乞南官得司寇卽迎太母就養會
建立 皇太子加恩百官得進封父母元氏

又趣使謂子曰人生適志耳富貴何爲母壽
既衰無去日遺悔也願棄吾官就而封扶母
以歸子如命以請適改北司寇郎因又奉太
母北居一年疾卒在乙未冬十一月二十有
四日元氏聞訃號痛徒跣疾走都門扶襯去
于是鄉人復曰嘻孝哉沈氏之世也事生以
祿執喪以禮可謂能子若孫也已翁以景泰
甲戌生母景泰庚午歲生以某年月日合葬
于某鄉之原子一卽元氏元氏子三長應龍

翔卿其字應鵬應鸞應龍今爲郎中階奉直
大夫 詔封元氏如其子官銘曰沈氏奕奕
世種其德若農服穡肇翁殖之元氏力之司
寇獲之美載厥世以食于孫子嗚呼懿哉

故春湖俞先生合墓誌銘

史稱某年樹穀百年樹德余觀春湖先生行
績不誣哉不誣哉先生姓俞氏名瓛字廷貴
別號春湖曾大父道成道成生天澤天澤生
士弘士弘生瓛瓛兄弟五人曰琛玘璿璧蓋

自上市居平湖然莫詳其所始云予幼侍先
公言平湖之俗以爲敦朴慷慨好誦說詩書
有古長者之遺風焉比予游觀里閭乃往往
失其故實若先生則猶行古之道者與夫俗
所以貴敦朴能誦說者以爲媿睦好禮義誠
緩急足恃也夫其處昆弟朋友之間平居恹
恹強笑語以相取無弗媿媿樂也一旦臨利
值危遂恚忿凌轢若不相識殊于胡越寧陳
腐捐倉庾而弗忍以其餘施諸姻族是顧可

謂好禮義足恃者耶先生性誠孝與兄弟友
甚兄琛者慕義易財動稱古俠士時時罄所
貲授人先生卽時時以已貲進瑣事弗咨弗
敢行惟恐有歡心弗稱也有姊早寡遺孤纍
纍先生撫之長爲擇良子女婚嫁之所居田
有邇人舍者其人業侵之先生卽徙其疆若
素亡田者竟弗與言于是里中之人無不頌
先生誼也是其于骨肉鄉黨之間于媿媿若
今之人遠矣平湖者僻在海隅去郡省稍遠

民視令喜怒卽旦夕異生死以故邑中豪滑兒輒伺纖微恐動細民處奸而網利先生歲督鄉賦獨愿恪無私營邑令熊居士選者弘治間循吏也則敬禮先生引與計事凡先生所計事行之民民輒曰神令神令然弗知先生言也他日所親或有所謁先生怒曰夫吾所以奔走事熊君者固以其人公廉吾足事也寧陰伺顯取若諸豪滑無賴者哉遂謝弗與通于是里中人謠曰郭東俞君當春握冰

蓋言先生之無以利易節也夫苟授一命于朝有所施被見于其下則其行義卓越豈不爲時良有司哉先生子男三人曰金銓鍾金爲學官弟子就業太學積藝弗庸遂謁歸視親終身不仕金之子咨伯舉進士任工部郎中時大工繁興奸豪窟穴其間而郎中夔夔節慎遂忤貴戚大臣請外去蓋先生抱貞履潔期樹于時而其闕未施者固自其孫明章之也天之祐善報德有徵也哉先生娶華亭

郭處士女柔惠有女德善事其舅姑先生素
喜飲酒竟遭疾郭氏以憂癯先逝先生尋亦
不起先生生于某年月日卒于某年月日郭
氏生于某年月日卒于某年月日子金等卜
以某年月日合葬於某鄉銘曰於休先生抱
鼓懷珎積行不試古之遺民陽山嶽岑湖水
泔泔亦有桐梓在湖之陰於休先生不邀德

音

包隱君墓誌銘

嘉興稱名族則雙溪有包氏包氏之族非甚
繁且熾也然子孫多修其先人之業務孝弟
耕田讀書或起仕于朝率斤斤奉禮法不殞
其職以故人稱包氏云予與包氏爲世姻又
與隱君之子汴遊習知隱君及觀其姪侍御
君節所爲狀欷噓曰是誠隱君之行也哉隱
君諱憑字信之父池陽太守諱鼎母宜人沈
氏池陽公生七子君最少憐之君生而秀異
身長七尺餘修髯癯貌玉立塵表望之儵然

異人也甫七八歲時卽機警善應對池陽公
燕賓客命諸子侍輒探字爲賦君應聲出奇
語賓客盡驚年十七善爲文補郡諸生諸老
生咸以爲弗若也池陽公故倦遊弗自決一
日得君所奉書啓重緘讀之無他言惟左太
冲招隱詩耳池陽公亟賞之卽抗疏解章綬
歸池陽公素廉囊無餘貲乃盡贖諸子君贅
平湖袁氏袁氏翁素重君多分與僮僕財產
以是得畢力學問然數試有司輒弗偶有快

快心一日忽嘆曰嗟乎夫人生去死之期至
近也富貴于身至疏也卽儒生糾纏章句間
善卑卑困人意白首無以自見夫以至近之
期從事于糾纏自困之業以幾至疏之富貴
陋亦甚矣昔者揚子雲桓君山非大富貴也
其爲文非欲售時好也然後人以爲挾其書
貴擬千石富踰猗頓乃富貴身自有之奚必
曳朱輪居華屋之下哉于是遂棄舉子業隱
居溪上發古書盡讀之數年會池陽公卒哀

幾遘疾則又嘆曰夫人貴讀書多聞識者將以窮天人達性命有益吾心也然書顧浩汗讀之數年尚不能窺其際于吾心何益哉乃又棄其支蔓之學專心莊老自稱澄心居士日與方士究論養形鍊神之術遍遊吳越諸名山訪求神仙庶幾遇之意欣然樂也則又嘆曰嗟乎使予遇神仙楊子雲桓居山奚足爲予道哉竟如是終其身平生性夷曠未嘗睚眦人人亦無睚眦之者又好施與往所得

婦家貲盡分與諸貧昆弟又日召諸昆弟宗族置酒樂飲至罄其貲乃已且不問家人生產作業以故家遂貧正德庚午仲兄志卒以遺孤二子屬君君涕泗受命携貲教誨垂二十年遂各有成立二子長節次孝俱舉進士擢兩臺御史執憲南北當世以爲榮每從縉紳道君行未嘗不泫然泣也嗚呼君可謂篤行君子者矣君生于成化丙午卒嘉靖壬寅年才五十有七于神仙竟弗遇也子汴郡廩

膳生好修能文當振君之後娶華亭張氏女
二長適秀水項相季嘉善薛孝俱國子生孫
男四長檉芳聘平湖曹氏次桂芳聘秀水楊
氏餘幼孫女二長受聘海鹽倪氏子秀秀水
諸氏子子汴將以君卒之明年癸卯冬十二
月某日塋君于白苧鄉之新阡以誌銘請予
從之爲之題曰包隱君之墓銘諸幽銘曰亦
有君子載德而處龍螫于淵雲密弗雨躡彼
名山庶幾羣仙生也弗遇神當與還

姪鏐壙誌銘

伯樂遇驥于途顧之嘆曰矯哉此真千里駒
也市之數百金歸逾月馬病腓死人讓之則
又嘆曰嗟乎夫馬顧能千里與不能千里耳
卽良馬無死則原氏弗貧終生弗天乎悲夫
予之視鏐殆所謂駒千里者非歟而遽天以
死也甲申歲予得請歸省太夫人因上先人
塚會族子弟族子弟鮮事文業唯姪鉅飭而
修然年長予也少則有鉅鏐秀予召鏐叩之

與論舉子業業日精乃稍與論述古文輒曉
通其大意因就予學明年春詣京師鑄謁請
偕不許則密走丹陽踈屨負書行風雨中
無一人隨者予駭曰志哉遂留不遣進學甚
厲每寬譬之不棄也冬月苦寒鑄以纊障扇
日擁面坐予大異以爲不祥比又病肺因謀
遣之歸不獲而獨時時往釋氏喜談說空寂
顧日病痿甚更大醫百方療之不効忽一日
上氣喘欲絕嘔血二升許淚蘇蘇下予起抱

之則顧曰悲夫吾弗及慰吾叔父死且無有
聞也又曰吾幸獲從吾母于地下父老矣竟
弗能一朝養乎婦甚幼必令更適母貽父憂
是在叔父言頃之死死四月始獲歸其喪予
病亦幾殆嗟嗟鑄乎使爾生弗慧弗予隨也
弗予隨又奚旅食以死終不一覲爾父與妻
訣也爾魂營營乃卒依僮奴携襯返歸冲波
沿流數千里烝烝孤也嗟乎天乎使鑄至此
毒也是予之罪夫是予之罪夫鑄生于正德

癸酉卒嘉靖乙未年才二十有三顏替而方
頤目炯炯視弗類天者妻沈氏方在疚予未
諉其操行銘曰嗟爾鑄若苗翹翹弗食爾獲
農盡以勞嗟嗟爾鑄

明中憲大夫貴州按察司副使致仕苧

村諸先生墓誌銘

往余童子時每從馮先生霽胡生逢造苧村
先生歸未嘗不克如其有獲也今二君之墓
皆宿草矣其又奚忍復銘先生墓哉悲乎悲

乎先生器宇清朗健談辯時出詼譎工於詩
辭不矯不附不矜瀆其接厚利也若忘其處
蓬葦若大廈也以故人無少長咸尊禮之云
嗟乎余蓋遊縉紳間見縫掖之士為赫赫者
尚威而窳惠慕皦皦者喜譽而止實或乃攘
華要以自利怵巨貴而劫於勢者媮媚縱弛
鮮有立矣至其下者揣摩機識忍蒙詬詈博
巨資以利永久盱睢罔上而不足齒焉先生
初令兩邑內歷曹署外鎮藩臬未嘗好近名

務矯飾詘勢遺利而所蒞咸著聲績其舉進士也與今閣大臣貴溪公同年雅相好也先生出僉福建貴谿公張祖都門其擢賢州也謂銓司揚某曰諸某者雅秀人也豈宜以西南荒裒居之哉余聞之回附訊先生竟不荅也是其人矯然雲泥之外豈以夷險非美殊志者乎既乃見幾勇止內無絳罽歸居東郭之外舊廬蕭然不問產業日與其所厚善徜徉山水觴詠為樂劇談古今琅琅傾聽性又

善攝好外家傳語或無賓客則靜坐偃息時延黃剡叩玄秘說化術不營營為子孫計人謂其近神僊人即期願無論也而年僅踰六十豈脩短之數固非所諳哉按狀先生姓諸諱偁字揚伯彌苧村子上世由宋汴來徙紹興已六世祖壽徙嘉興遂為嘉興人壽生安生貴賢生士明士明生忠為梧州守梧州生四子仲子數好讀書通陰陽家術余童子時師之贈按察僉事寔生先生云先生幼孱弱

多疾然即有志槩年弱冠盡通經史百家言
補邑弟子貢令譽藉籍中正德癸酉鄉試丁
丑舉進士授黃梅縣令黃梅素多桀難治令
至者輒相繼罷去蓋未嘗有三年終者也時
值宸濠構逆兵士仰給縣官民罷遺餉多就
亡匿先生摧抑豪右撫循疲弱亡者稍稍集
越二年以父制去任起改大名縣大名為王
畿輔邑土風淳龐因俗而治不事紛擾民至
於今思之丙戌徵為刑部主事丁亥丁母周

氏艱庚寅起復主事進貢外郎尋陞福建按
察僉事忤弊剔奸覈理屯政盡舉丁酉擢貴
州叅議貴土官遇上官至例輒有餽先生卻
之一錢不受有安宣慰者大酋也法當承蔭
然非預業賂莫敢請先生知之即為判牒此
其服廉守介雖子罕之卻璧勇安之揮金何
以尚之越二年擢本省按察副使持明懸平
輕重咸適平反之家有繪像祀先生者於是
吏憚而縮民恃而舒夷怵而震知先生之不

可以罔信矣然而遇事不私無所阿比或悒
悒不自悅辛丑春竟上書乞致仕怡怡然若
舉重負而釋之也先生居常無愠容亦無惰
色不畜姬媵樂與後進雖卑幼有過不面斥
之諷之使改而已有二妹者貧無嗣也事之
生死盡誼雖古之篤行君子何以加諸即使
徒唯唯致位卿相奚足多哉先生生成化丁
酉卒嘉靖癸卯壽六十有七配俞氏累封宜
人子一夏庠生娶馮氏繼顏氏女二長適周

于德次適張桐孫男三鈺聘包汴女鈺聘鄭
鑾女鈺聘陳詔女孫女一許聘沈茂完子夏
卜嘉靖乙巳年十一月十三日壬申葬先生
於永豐鄉祖塋謁余為銘銘曰 名以德永
不可謂短業以行著不可謂塞身沒而聞存
不可謂靡遠嗚呼先生上壽雖靳積則有餘
崇丘巨澤實生璠璣嗚呼諸氏亦熾其貽矣

居
漸
山
蘭
暉
堂
集
卷
之
十
一



